

ADAT BOKODIN AUR & ORUMPUN LUAK ULU MUAR

Kok perahu botambatan
Kok dagang botopat an
Kok paneh tompek bolindung
Kok hujan tompek botoduh
Kok hauh mombori air
Kok litak mombori nasi

Rumah nan bokotak botanggo
Kampung nan bosudut
Sawah nan bojongjang

Sikit tando ingat
Banyak tando ado
Hati gajah samo dilapah
Hati kuman samo dicocah
Kok banyak dibori boumpuk
Kok sikit dibori moraso

Kok makan biar nan halal
Kok memakai biar nan borosih

Orang bobudi kito bobahaso
Orang mombori kito moraso

Orang disuruh dibori bolanjo
Orang ditambek dibori makan



Buapak sedang menjalankan adat bokodin dari Luak Ulu Muar

Orang ditarek dibori ghoto
 Orang boranak nak boupah bidan
 Orang monikah dongan maha eh
 Orang hidup nak bobolanjo
 Orang mati nak dikharajatkan
 Orang boadat mengisi adat pusako eh
 Hukum bodiri dongan saksi
 Adat bodiri dongan tando
 Kok ke bumi samo dibontang an
 Kok ke langit samo diserak an
 Kok tulang samo putih
 Kok daging samo borek eh
 Souri sotomunilah kito
 Soelakan pusek
 Somilu pambahagian eh
 Pusako samo digilir an
 Kobosaan samo diturun an



Buapak sedang menepung tawar dan mencecah darah kepada anak angkat yang dikodinkan..

Akhir eh bokatolah buapak:

Hari ini ese Tok Senaro Sati Buapak Adat suku Mungkal mengodinkan ko Suku Mungkal Luak Ulu Muar.
 Domikianlah adat mongato, adat menyusun dalam rentetan cerito istiadat bokodin iaitu adat mengaku bosodaro
 antara seorang omak (ibu) angkat, adik-boradik, anak-anak dan sodo ahli suku eh. Masuk suku ado jo disebut dek
 orang bokodin. Untuk lobih sodap laie, kita tonton dan dongar posombahan Kumpulan Dato'-dato' Lembaga Luak
 'Ulu Muar membuek posombahan "Adat Bokodin Aur Sorumpun".

Poi ko toluk boli borangan
 Buah nangko di topi laman
 Adat nan elok dibuang jangan
 Jadi an pusako jaman bojaman

HURAIAN ERTI ADAT BOKODIN

"Bokodin" maknanya adalah bersaudara. Adat ini bererti adat mengaku bersaudara antara seorang individu dengan ibu angkatnya. Begitu juga dengan adik-beradik, anak beranak ibu angkatnya. Bahkan semua anggota suku itu amnya.

Adat bokodin juga dikenali dengan kata lain "masuk suku" khususnya bagi orang-orang yang berasal luar dari Negeri Sembilan, lebih sinonim dengan istilah "masuk suku". Hinggalah kadang kala dipermainkan dan dipersenda-guraukan. Misalnya kalau orang luar berkahwin dengan orang Negeri Sembilan kenalah masuk suku sahaja.

SEBAB-SEBAB BOKODIN

Bokodin tentulah ada sebab dan kerananya. Tidak masuk suku saja-saja atau suka-suka hati. Pertama orang dagang atau perantau yang datang ke Negeri Sembilan, dia tentu berasa sunyi maka diapun mencari emak angkat atau "induk semang". Adat Perpatih menggariskan:

Kok perahu bertambahan
Kok dagang bertepatan

Pada masa lampau sekiranya lelaki luar Negeri Sembilan ingin berkahwin dengan seorang gadis Kuala Pilah umpamanya, dia hendaklah terlebih dahulu dikodinkan dengan mana-mana suku dua belas Luak Ulu Muar ini. Tetapi tidak kepada suku bakal isterinya. Ini kerana Adat Perpatih mengamalkan sistem "Eksogami" iaitu "kahwin di luar suku".

Perkahwinan yang unggul dalam masyarakat Adat Perpatih ialah antara pasangan lain suku dan dalam sesuatu perkahwinan, suami tinggal di rumah isteri "Matrilocal".

JENIS-JENIS BOKODIN

Bokodin terbahagi kepada dua iaitu:-

1. Bokodin Pinang Sebatang atau Bokodin Sebilah Lantai atau Bokodin Selaih Atap. Ia diselesaikan oleh buapak sahaja

2. Bokodin Aur Serumpun atau Bokodin Adat dan Pusaka. Ia melibatkan buapak, besar waris, lembaga dan penghulu luak.

Dua jenis bokodin ini berbeza adat dan istiadatnya, syarat dan rukunnya. Fungsinya juga berlainan. Bokodin Pinang Sebatang lebih menjurus kepada sekadar menjalinkan ikatan saudara. Ikatan kekeluargaan ini memberi manfaat kepada individu yang bokodin. Dia telah ada tempat mengadu hal dan sakit pening ada orang yang mengambil tahu. Adat berkata:

Kok panas tempat berlindung
Kok hujan tempat berteduh
Haus memberi air
Litak memberi nasi.

PENGERTIAN BOKODIN AUR SERUMPUN ATAU BOKODIN ADAT DAN PUSAKA

Bokodin jenis ini bukan saja sekadar menjalinkan tali persaudaraan tetapi lebih jauh dari itu. Ia benar-benar menjurus kepada sasaran apa yang dikatakan mengikat "pertalian darah daging" khasnya ibu sokonya (emak angkat) yang menerima pengkodinannya, adik-beradik keluarga terdekat dan suku waris itu amnya.

Bokodin Aur Serumpun menggambarkan satu-satu pengertian yang bukan sahaja tersurat bahkan tersirat jua. Contohnya menyembelih seekor kerbau melambangkan begitu sakitnya seorang ibu semasa melahirkan anak, tumpahan darah dan seumpamanya.

Penyembelihan itu mesti dibuat di dalam kampung pusaka adat, tidak boleh disembelih di pasar atau di padang. Ini mengingatkan kita bahawa seolah-olah anak yang dikodinkan itu lahir atau tumpah darahnya di tanah pusaka adat tersebut. Perbilanganya:

Rumah yang berkotak bertangga
Kampung yang bersudut
Sawah nan berjenjang.

Dagingnya dimasak dan dijamu semua anak-anak buah dalam suku tersebut. Sedikit daging mentah, hati, jantung dan lain-lain diagih kepada lembaga, buapak dan besar waris. Ia adalah pemeliharaan anak-anak buah kepada yang menjadi ketua adat. Doa pun ditampung menandakan kesyukuran. Perbilangannya:

Sikit tanda ingat
Banyak tanda ada
Hati gajah sama dilapah
Hati kuman sama dicecah
Kok banyak diberi berumpuk
Kok sedikit diberi merasa

Alangkah unggulnya mesej yang diterapkan oleh budaya Adat Perpatih iaitu mengasuh dan melatih penganut-penganutnya beragama, berbudaya dan berbudi dalam perasaan yang halus.

ISTIADAT SEMASA UPACARA BOKODIN

Dalam istiadat Bokodin Aur Serumpun atau Bokodin Adat dan Pusaka perkara yang harus dilakukan ialah:

Tepung tawar

Istiadat menepung tawar anak yang bokodin dan ibu sokonya bermaksud mensucikan kedua-dua mereka. Ini dilakukan oleh buapak.

Kok makan biar yang halai
Kok memakai biar yang bersih

Cecah darah

Istiadat cecah darah ini juga dibuat antara anak, ibu dan buapak. Darah asen digunakan bagi istiadat ini. Darah seperti yang kita maklum adalah najis. Setelah anggota badan kita disuci dan dibersihkan tidak wajarlah dikotorkan pula. Dulu-dulu memang benar darah haiwan digunakan. Hari ini kita berpegang kepada hukum adat

dan hukum syarak yang bertimbal balik. Adat dan agama bak aur dengan tebing. Sandar menyandar, agama Islam melengkap dan menyempurnakan Adat Perpatih. Perbilangannya:

Adat bersendikan syarak
Syarak bersendikan hukum
Hukum bersendikan kitab Allah
Syarak mengata
 Adat mengikut
 Syarak mendaki
 Adat menurun

Pemberian anak buah

Kain putih dan kain hitam diberikan kepada Dato Lembaga melambangkan keikhlasan dan suci hati anak-anak buah menerima anak yang dikodinkan atas perkenan Dato Lembaga iaitu suku yang empunya adat.

Orang berbudi kita berbahasa
Orang memberi kita merasa

Duit adat

Duit adat adalah pemberian yang lazim kepada ketua-ketua adat. Perbilangannya:

Orang disuruh diberi belanja
Orang ditambat diberi makan
Orang ditarik diberi harta
Orang beranak nak berupah bidan
Orang menikah dengan maharnya
Orang hidup nak berbelanja
Orang mati nak dikharajatkan
Orang beradat mengisi adat pusakanya

Sebuah Al-Quran

Sebuah Al Quran menjadi saksi berlangsungnya adat dan istiadat tersebut. Perbilangannya:

Hukum berdiri dengan saksi
Adat berdiri dengan tanda

Ikrar sumpah setia

Ungkapan ikrar sumpah setia anak yang dikodinkan kepada ibu soko, buapak dan suku semasa istiadat "cecah darah".

Jari manis kanan anak yang dikodinkan, ibu soko dan buapak dicelup ke dalam darah di dalam mangkuk.
Ungkapan buapak: Hari ini saya Tok Senara Sati Buapak Adat Suku Mungkal mengkodinkan ke Suku Mungkal, Luak Ulu Muar.

Kok ke langit sama diserakkan
Kok ke bumi sama dibentangkan
Kok tulang sama putih
Kok daging sama beratnya

Jadi pada hari ini:

Seuri, setemunilah kita
Seelakkan pusat
Semilu pembahagiannya
Pusaka sama digilirkan
Kebesaran sama diturunkan

Surat akuan bokodin

Akhirnya menandatangani surat akuan bokodin yang disahkan oleh Dato Lembaga. Dalam perakuan ini dicatat dengan jelas dan lengkap pemberian tanah kampung dan sawah kepada yang bokodin. Dia berhak mendapat 1/3 bahagian tanah pusaka adat, baki 2/3 bahagian tanah pusaka adat itu diberikan kepada waris yang terdekat.

Orang ditarik diberi harta
Waris jangan ditinggalkan
Orang diberi boleh sahaja
Orang monobuk padangnya luas.

Seterusnya mereka merafak sembah Dato Lembaga diikuti anak-anak buah sekalian. Maka selesailah adat Bokodin Aur Serumpun atau Bokodin Adat dan Pusaka.